



सुरथ नाज्जारी

आदि शैतान सैतान

आंनि थैनाय सैनाय

सुरथ नाज्जारी

नौ-नोगोर पाब्लिकेसन्स्
औगुरी, झारबारि,
क'कराझार।

ANGNI THOINAI SŌINAI : A collection of Bodo poems
composed by Shri Surath Narzary and published by
Shri Pradeep Kumar Bargayary, for and on behalf of
Nau-Nwgwr Publications, Ouguri, Jharbari,
Kokrajhar, BAC, Assam.

Publisher :

Shri Pradeep Kumar Bargayary,
Nau-Nwgwr Publications,
Ouguri, Jharbari,
Kokrajhar, BAC, Assam.

First publication :
September, 2001.

© All Rights Reserved by the author.

Rs. 25.00 only.

Cover :

Designed by Shri Kamal Gayary, MFA.

Printed at **Pioneer Printers**, Kokrajhar.



बाउनाय

नीलकमल !

आं गोसो-गोर्बोनिफ्राय
नों मोजां मोनग्रा
'आंनि थैनाय सैनाय' खौ
बाउबाय !

नोंनि,

आदा सुरथ।

31-7-2001.

रायफोरनाय

माब्लाबा सोरनिबा खन्थाइ बिजाबनि रायफोरनायाव ना आंनि बबेबा लिरबिदांआव आं बुंदोंमोन दि जेसेनो खन्थाइनि सिंआव हाबनो नाजादों एसेनो बेनि फारसे आंनि गिनाया बांसिनदोंसो । अबश्ये अब्लाबो आं खन्थाइखौ नागारनो हायाखै । खन्थाइयाबो आंखौ नागाराखै ।

बेबादिनो बोरैबा बोरैबा सुरथ नाज्जारीनि डिटिपि खालामनाय जाबसेमानि खन्थाइ मोनदों आं स्वानथामसोनि सिगां । थोंजोडै सुरथ नाज्जारीनिफ्राय नडा, नबीन वारीनिफ्रायसो । मोनसे रायफोरनाय लिरनानै हरनांगौनो । बिबानआ खन्थाइ सोरजिनायनिखुइ गिलिरसिन । बेनि स्वायाव आखाइयाव मावथ्र'हायै खामानि थानायलाय समनि आंखाल । थेवबो फंनैसो लिरथारनांगौनो । नबीननि नारसिननाय ।

बे बिजाबाव गासै 28 खन्थाइ दं । माखासे लाउवा-सुडा, माखासेया गोलाउ । गोलाउ खन्थाइफोरा बर्नायलु खन्थाइ (narrative poem)-नि महर लादों । बेफोराव historical elements-जों लोगोसे foreign phrase-फोरबो दं । फरायनाय आरो रोंग'थिजों गुफुं जानायनि नेसोंन बेफोर । बेफोरनि स्वायाव इसे दखल थायोब्लानो फरायग्राफोरा खन्थाइफोरखौ बुजिनो गोब्राब मोननाय नडा । मानोना अंथिखाल गोदान खन्थाइनि गुदु सिम्बल आरो सावगारि सुरथ नाज्जारीनि खन्थाइफोराव गैया ।

'नोंनो ना बर'आ ?' मुंनि खन्थाइआ हारिखौ थांखिनानै मोनसे criticism । बेयो सुरथ नाज्जारीनि गिबि सोरजिनाय खन्थाइ नडाब्लाबो बोसोर ब्रैजिसो गोबावनि जागोन । अब्लाबो खन्थाइनि गुबै बाथ्राया दाबो लोब्बा गोनां (relevant) जानानै दं होनजायो ।

Narrative-आनो जा एबा गुबुनआनो जा, सुरथ नाज्जारीनि नोजोर होनो गोनां मोनसे आखुथाइआ जाबाय फेस्ला आरो उलथाओंथिनि गाब बिलिरनाय (tinge of humour and irony) । बेफोरनि हेफाजाबै हारिनि एबा सोरनिबा गेना-गोरोन्थिखौ सोंखारिनायाबो इसेल' गोसा नडा ।

माबा मोनसे जाथाइ. माबा मोनसे नुथाइ एबा सानस्रिनि stimulative force-आ जायखि जाया खन्थाइगिरिखौ खन्थाइ सोरजिनो थुलुंगा होयो । सुरथ

नाज्जारीनि बेलायावबो बेयो सैथो। बिदिन्थि महरै आं जुनियायै मुंख'नो लुबैदों बिथांनि 'गुरुनि मोनसे प्रबचन : अन्जालु प्रबननो' मुंनि खन्थाइखौ। प्रबन बरगयारीनि 'गुरु दक्षिणा : सुरथ सारनो' खन्थाइखौ मोनामोनब्ला जों मोननाय नडामोन आथिखाल बर'नि moral degradation-नि एबा माखासे suicidal आखल-आखुनि authentic जारिमिन 'गुरुनि मोनसे प्रबचन : अन्जालु प्रबननो' खौ। बे दोनै खन्थाइआ मोनसे समाव बड़' गोरों-गोराफोरनि लेहेम सानस्रियाव हुरागासे सोमावग्लुंनाय लाबोदोंमोन। मानोना प्रबननि गुरु दक्षिणाया एकलब्यनिबादि आसि बिमा नडामोन, नैजि जौथाइनि AK-47-सोमोन। आरो बेनि ज'खायै जराल जादोंमोन 'गुरुनि प्रबचन'आबो।

आं साननायाव बै समाव प्रबननि AK-47-खौ लानानै गुरु आरो सोलोंसानि गेजेराव 'सिलाइनि गराइखौ बुंदों ना रेसनि गराइखौ बुंदों'बादि माबा मोनसे गोरोन्थि सानलायनाय दंमोनब्लाबो, दा बेयो गैलिया। बेयो बेयावनो थार्थोंसै।

बेफोर जाबाय मोकथां जाथाइजों लोब्बा गोनां खन्थाइ। बेफोरनि अनगायै वे बिजाबाव जों मोनो 'आंनि थैनाय सैनाय', 'एफा एफा', 'मोनै हांखो', 'फैमाल मिजिं', 'हाइना गाब', 'आं बुंलिया'बादि माखासे र'मान्टिक खन्थाइ। जानो हागौ बेफोर आगु बैसोआव सोरजिनाय खन्थाइ।

बेफोर गासैखौबो लानानै सुरथ नाज्जारीनि खन्थाइ बिजाबआ फरायग्राफोरनि आदर मोनगोन होननानै आं मिजिङ्ग खालामो।

बागानसालि, क'क्राझार
30-07-2001.

ब्रजेन्द्र कुमार ब्रह्म

खुगा बेखेवनाय

सोरनिबा खन्थाइआ राफोद खन्थाइ जामाग्दोंब्ला वं खन्थाइआ
जागोन—Theophile Gautier-आ बुंनायबादिनो—

Even the gods must die

But sovereign poetry

Remains,

Stronger than death.

अब्ला आंनि खन्थाइआबो खन्थाइ जामारदोंब्ला आंहाबो जेबो बुंनांगौ
गैया। नाथाय माखासे खन्थाइनि reference एबा background-खौ
फोरमायाब्ला misinterpretation जानो हागौ। बेनिखायनो खुगा बेखेवनांवाय।

इं 1989 माइथायाव आं 'जीउनि अलंबार' मुंनि गांसे आरज मेथाइ
दिहुनदोंमोन। नाथाय बेनि गिबि आं माखासे खन्थाइ लिरदोंमोन—जाय खन्थाइफोरा
गुबुन गुबुन लाइसि बिलाइफोराव ओंखारलांबाय: बेफोरनि मादाव खायफा Text
Book-फ्रावबो जायगा मोननाय। नाथाय थेवबो बेफोर खन्थाइफोरखौ लाखोमा-
सिखोमा खालामनायनि मेलेमाव खिलिफैदोंमोन आरो आरज मेथाइनि अनगा जेबो
रोखोमनि लिरनायनिफ्राय निब्बाण लाभ खालामनो सानदोंमोन। नाथाय बेफोरबादि
बाथाखौ आदा ब्रजेनआ अगेन गनायदोंमोन आरो प्रबनआ खारखोमानाय सानदोंमोन:
आन्दो आरो गुदियाव सासे खुद्रिग्रा मानसि दंबावोमोन—बिनो जादों बड़' सल'
अखांनि अराय अलंबार नीलकमल—जायखौ आं दाबो थैबाय होननानै साननो
हायाखै: बिनो बै समसिम लिरनाय आंनि खन्थाइमानिखौ Manuscript महराव
थाक्-थियारि खालामनानै दोनदोंमोन "आंनि थैनाय सैनाय" title होनानै।
मानोना—आं लिरनाय 'आंनि थैनाय सैनाय' खन्थाइआ फरायग्राफोरनि गेजराव
सावरायजासिननाय। खन्थाइखौ लिरदोंमोन आं Cotton College 2nd
Mess—दानि रण्जित बरपुजारी ह'स्टेलआव। खन्थाइखौ फरायनानै सोरबा सोरबा
फरायसाया सोडोनो : सार-हाबो जीउआव बेबादि दुखुगोनां जाथाइ जादोंमोन ना ?
नडा, जाथाइआ जादोंमोन आंनि आंगो ब्रिसुखे खन्थाइगिरि मुथ्री रण्जित कुमार

बरगयारीनि। नाथाय बे खन्थाइनि गोदान सैनायनि कल्पदृष्टि आरो dramatic monologue technique बाहायनाया आंनि। आं बे खन्थाइआव Robert Browning-आ My Last Duchess-आव बाहायनाय आदबखौ बाहायनो नाजादों। फरायग्रा महलआ मोजां मोननायनिफ्राय आं बुजिदों—आं बे खामानियाव जोबोरैनो successful. क'कराझार कलेजनि 'अन्जिमा' लाइसिआव जेब्ला अंखारो अब्ला सुखे रण्जितआ आंनिसिम दुखुगोनां गोलाउ लाइजाम लिरहरदोंमोन। बे लाइजामआ मोनसे गिदिर document-मोन, नाथाय दुखुनांथाव बाथ्रा—आं बेखौ खोमानानै लाबाय। 'आं बुंलिया' खन्थाइआ आं डाइन थाखोआव फरायब्ला लिरनाय आरो बे समावनो मुश्री चरण नार्जारी सुजुनाय 'आलारी'आव ओंखारनाय।

Satire नडाब्लाबो Satiric element-नि माखासे खन्थाइफ्रा हारिनि माबेबा माबेबा बाथ्राफोरखौ गोसोखांफोनांनानै बेरखांनाय spontaneous outburst; बेफोरखौ लिरनायाव आंनि रेबगनआ दान्दिसेबो थाद'वाखै। जानो हागौ—बेफोरबादि लिरनाया सोरनिबा गोसोआव दुखुबो फोनांनाय जाबाय। बेफोर Satire-नि मादाव 'नोंनो ना बर'आ ?' आरो 'गांसे लाइजाम : बिजय बाग्लारीनो' - आनो बांसिनै गोखै-गोखा जादों। खोनानो मोनदों बड़' राव-बिहुंआ गत् गैया गुदि गैया जानाय समाव 'प्रम'द बाबुनि सोदोब बिहुंआव सोदोब गैया' होननाय बाथ्रायाव बोरायआ मोदोमाव नांदोंमोन। खन्थाइजों लिरलिया बुंदोंब्लाबो Dictionary सुजुनो Mysore-आव थाहैनाय समाव बिहार-कलिङ्गनि सीमा सेरनि दैया दैमा (जाय दैमानि बालाबारियाव सम्राट अश'कआ कलिङ्ग राजाजों दावहा नांदोंमोन) सेराव थानाय बौद्ध मन्दिरआव दै बिब्लाबो दै मोनैनि दुखुआव खन्थाइ सोमजिदोंमोन : तथागतनिसिम मोनसे फोरमायहरनाय। सिम्बोरगामिनि Bodo Sahitya Sabha-नि खन्थाइगिरि जथुम मेलआव बाहागो लाहैनायनि मुडै लिरनाय 'बे माइनाव नोगोराव आंबो फैयो'। 'गिबि मुंख्लं'आबो ग'साइगावआव ज'नाय Bodo Sahitya Sabha-नि खन्थाइगिरि जथुमनायाव फरायथिहैनाय। 'गुरुनि मोनसे प्रबचन : अन्जालु प्रबननो'आ प्रबननि खन्थाइनि सायाव फिननाय। गुदि बैसोआव लिरनाय खन्थाइफोरनि सोमोन्दै आं बारा रोखा रोखा बुंनो हालिया। नाथाय मोनसे बाथ्राया रोखा—आं बै समाव Shelley-बादिनो मोनदाडोल'मोन : I do not know why I am so sad. बेनिखायनो नामा—आं खन्थाइ लिरफोनाडोमोन.

खन्थाइ लिरनानै गोसोखौ सोरां मोनोमोन। बै समनि बाश्नाखौ गोसोखाडोब्ला आं मोनसेल' बाश्ना बुंनो हायो : I did not know why I did write. औरैबादि सम दंमोन जेब्ला आं खन्थाइ लिरनानैसो उन्दुलांनो हायोमोन। नाथांय बेफोर खन्थाइफोरखौ आं दोनबोनाय जायाखै, दुखु खालामनांगौ जेबो गैया।

फोरमायनाया गाहाम—'मेरिना' खन्थाइआ मुंदांखां खन्थाइगिरि T.S. Eliot-नि मुंदांखासिन खन्थाइ 'Marina'। इनाइनो गोब्राबबो। बड़' थुनलाइआव थिसनूनों साननानै दानस्लायदोंमोन। 'जीउ सैनाय' खन्थाइआ मुंदांखा महरगिरि मुश्री श'भा ब्रह्मखौ लानानै लिरनाय। 'सोलेरनि हांमा' आ बड़'नि अराय आंगो डिमापुरनि बाइखोन्दा नेसोंनखौ लानानै लिरनाय। माखासे खन्थाइनि सोमोन्दै बुंलिया, जानो हागौ बेफोर life's momentary episodes नडाब्ला essence.

जोबथारनायाव बुंथारनांगोन—बे बिजाबआ प्रबन, प्रफुल्ल आरो नबीननि दांगाब-सिगाबजोंसो ओंखारनाय। बिसोरनि दांगाब-सिगाबखौ लागाम हमनायनि आन्दोआव दं आदा ब्रजेन।

नीलकमल ! नों ओंखारजानो लुबैनाय 'आंनि थैनाय सैनाय' आ दिनै जोनोम मोनबाय नबीन-प्रबनमोननि नाजानायाव। नों गोजोनदो।

सुरथ नाजारी।

31-7-2001.

फारिलाइ

आं बुंलिया	1
खैदां	3
नोंनो ना बड़'आ ?	4
आंनि थैनाय सैनाय	7
फोथायखेबस'	12
एफा एफा	13
फैमाल मिजिङ्ग	14
शोलेरनि हांमा	16
सिमांनि ह्वादर	19
आर'ज	21
मोनै हांखो	22
गोरोबै देंखो	23
हाबिलास	25
गोसो	27
मेरिना	28
जीउ सैनाय	31
हाइना गाब	36
गांसे लाइजाम : बिजय बाग्लारीनो	37
गुरुनि मोनसे प्रबचन : अन्जालु प्रबननो	41
तथागतनिसिम मोनसे फोरमायहरनाय	46
जुगे जुगे कुरुक्षेत्र	50
गोदान इयुननि मेथाइ	52
मेलेमजीबि	53
गिबि मुंख्लं	55
गुदि बोसोनगिरिफोरनिसिम	58
सोदोब	60
बे माइनाव नोगोराव आंबो फैयो	61
नों थैनो रौंनाय नंलिया	65

आं बुलिया

लामायाव लोगो मोनब्ला—
मिनिस्तु जानानै
गन्थं थेमनानै,
दाबोरसे दोम् गसंथायो मानो ?
रायज्जायहां, मिनिहां
ददब-मादब, मोदोम थोर थोर मावयो मानो ?
रायज्जायब्लाबो मोदोम मावनाय थाफाव
बेरखांजोबा;
साननायमानिखौ बावजोबफिनलाडो,
गोजान सौहैखांब्लासो
गाव बुंनो साननायखौ
गोसोखांफिनो ।

आंजों रायज्जायब्ला
मानो बिब्दि जायो स'ना ?
—खिन्था रोडा ?
बोरै खिन्थारोंनो स'ना !
मानोना,
बिब्दिखौ नों आन्जाद लायाखै ।
—आं खिन्थानो स'ना ?—
खिन्थालानि आं, नाथाय—
सिगाडाव खिन्थाग्रो—
नों सोरखौ मोजां मोनो ?
—आंखौ ?

ए, बिखायनो आंखौ नुब्लानो
नोंनि गोसो गोरलैया गाबखाडो ।

मोजां मोननाय स'ना,
नोंजों आंजों अनलायनाय ।

बिनो फोजायो
नोंनि गोसोखौ ।

आंबो नोंजों रायज्जायब्ला
बिब्दिनो जायो ।

मानोना,
आंबो नोंखौ मोजां मोनो ।
मोजां मोनलायसेयावबो

मोनलायाब्ला मा जायो ?

मिथिगौथ' स'ना ?
ओंखाम उखैया दै गाडा,
गोसोआ जायो उरां-फारां ।
आरो, बारा बाराब्ला—
गोसोआव हांमा लानानै
दिख्खारजों थैलाडो,
नोंनि मोदोम मावनायखौबो
मोजां मोननायानो खालामदों स'ना ।
मोजां मोननायनि बोलोखौ

मिथिबायथ' ?

आय', जीउनि स'ना,
नों मिथिबाय जेब्ला
आं बुंलिया ।

—*—

खैदां

मोनदांनाय आरो मोनदाडैनि सेर सेर
गोमोरलांबाय; हारसिडै सेरे गाबखांनायाव
बेरखांनाय राबआ !
सेरेयै रानज्जिलांबाय दिनै गोसोनि
हमथानो हायै दावगानाया ।
थब्ल' थब्ल' सानसि सानसि देरहाबोनाय
देरहासाद गथ' साया दिनै दै मोनलोंबाय—
बुरलुं-बुथुर दैमायाव ।
थिर-बिर गसंथानो नाजानाय आंखौ
सोरबा नारख्लाइनाया, दायआ आंनि नडा ।
आं बेंगुरा दिनै—थथ्लाबो
आंहा इनाइनो दाहा दड ।
जारिमिन—
गोलाउ हांमा सुरनाय आंनि
आरो उदायै आगान सुरनाय
गोसो मोदोमनि ।
जारिमिन : राजा इरागदाव
थैनायनि उनाव आं
दुखुनि जान्थासे लॉनानै उन्दुदोंमोन ।
आं नंदों 'मैयासो उन्दुदां
दिनै सिखांबाय ।'
नाथाय आंनि साननाया जादों—
'रिप-भान उइंकल'नि ।
आं बेसेबा मुगा उन्दुखांबाय,
दाब्ले खासेवआनो आंखौ बारग'लांबाय ।
आंनाव दिनै 'काउन्ट अफ मन्टिक्रिष्ट'नि दुखु दड ।

—*—

नोंनो ना बड़'आ ?

(सोंखारि-खन्थाइ / (A Verse Satire)

सोर जाखोब्रा नों ?
बड़' ? —जायहा दड खिबुआव खर'
माबा सानबा माबा मावग्रा जायनि सर'—
बिनि मुडानो माथो बड़' ।

ए, —रागा जोंबाय नों ?
होम्बा नों घट'तुकसनिसो बंश
बेसेबा गिदित मोदोमखौ लानानै
जाय थिफुद्ला—ओंखाम बुर्जा जानो हाबा
घट'तुकसनि बंश होननानै लाग्रा ।
दावहाथिलियाव थांबा दाबोनो नों मोदोमखौ
खोख्लैसोनानै हाजार हाजार मानसिखौ
फोथैनो हाबावगोन; नाथाय
गावनि थाखाय नडा, मालाइनि थाखायसो
मोदोम गारसोमनायनि 'हायार' जागोन ।

आरोथ' जेबो बुंनानै लायो नों :
बीरनि बंश, राजानि बंश; राइजो गोनां ।
नंगौ,—नों जोहोलावमारु । बिखौनो
खाइसेबा 'बोर्मा फान्था' (म्लेच्छ) बुंदलाबायो;
आरु बोर्मा होनबा नोंबो रागा जोडो ।
मानो जोडा जानो, —नों जादों
जोहोलावनिसो बंशथार ।

नाथाय बिसोरो बुडो—नों माथो बोर्मापार ;
 नोंखौ बुथारनानै जानो दुरुंजों खानानै
 लांनाडा, —खोमायाव खेबनानै लांबानो
 दों-दों थाडो । (बिसोरो बुडो जोंबा
 बिदिनो बोनानै दान्थारगासिनो)
 आर् नोंखौ मा बुडो मिथिगौ ?

—नोंलाइनो मावजिनिफ्राय जोनोम जादों ;
 नों इनाइनो रागा जोंदों नडाहोम्बा ?
 आंबो इनाइनो दुखु मोनदों (जोहोलाव
 हारिखौ मानिथो बिदि जेरै मोनो एरै
 बुंद्लाबायो !!) नाथाय बियो बुंदों :
 जोहोलावमारबा बिसोर माथो रावखौबो जेबो
 खालामनो हादिया, —गावसो होखारजायो ।
 मावजिहा न'आव थाब्लाबो सुख गैया ;
 सैमायानो बिखौ नाइनो हाया । बिनिखायनो—
 बियो आसामाव जोनोम जाब्लाबो सम सम
 रिफिउजी जानांगौ ; बिनिखायसो बिसोरखौ
 मावजिनि फिसा होनो ।
 एत्—नंमारगौ ।

आर् बेल' बड़'—खिबुआव खर' ?
 जोहोलाव दैमालुनि शावआ बहा जोबनो ??
 दुनियानि नख्राडा थुंग्रिनि सोदोबजों गाबगां
 जोबब्लाबां नों जेबो खोनायाखै । मानोना :
 नों खोमाजों खोनालिया ; नों बिमा बाथुलनि
 लाहा साउथेनायनिफ्राय बहा ग'नो जोहोलाव ?
 मेगनावां लुथेजाबाय नों—नों बहा मांजां

दैदेनग्रा सिनायनो रोंनो (नों जायखौ दैदेनग्रा
लायो बिसोर एखनबा जातिखौ फानो) । आरो,
गन्थं लुथेजानानै आसाम ह्वादतआवनो बयजोंबो
नाखेबजानानै हां थिफुं थिफुं लायाबा
नों बहा ग'नो ? जोहोलाव दैमालुनि
शावआथ' दाबो जोबाखै—ह्वाजो खर' खर'
खारखोनानै थैजोबहैनो थाखाय नोंसा दाबोनों
अरं-बिरं हाग्रामा दड, आरोथ' थाबावगोन ।
आरोथ' राजउलाफादखौ लुबैनानै
गावजों गाव लाहा लुथेलायग्रा बिमा
बाथुलफ्रा दाबोनो देबोर नांलायगासिनो दड ।

—*—

आंनि थैनाय सैनाय

फैदो, गोदान सैनाय—

नों सोंबोबाय थानाय खोथाखौ
खिन्थानोसै आं;

खोनासंफैदो—बेसेबा गोलाउ
जारिमिन बेयो,

सिमां आरो मोकथांनि सल' -बाथा
मोननाय आरो गोमानायनि ख'बाम-खान्दा !

इसे दावबोबाव सैनाय,

इसे नाइफैनाय—

बेसेदि मोजांमोन बियो हाबाब
गोसोआव आरो मोदोमाव !

मेगनआ बेरस्रां, खानाइया रुम्बां
नाइनो बेसे मोजां;
आखाइया फामि बिबारनि थैन्था ।

आं नंखायखौ बुंदोंसै सैनाय ?

नाइ—नंखाय नडोबा नाइ,

आंनि बुंनाया बेसे गोरोबनाय !

आरोथ'.

बिनि जारौरौ खावलाया

बे सावगारियाव गैया.

बेव जेबो गैबावा रजे.

गैया—गैया गोसोनि अननाय.

गोसोनि साननायः
बेफोर गासिबो आंनि गोसोआवसो
दड लिरनाय ।

[बेनिफ्राय हिन्जावखौ बावनानै
सावगारिखौ नाइनानै बुडो—]

ह्वाब्रांनिफ्राय डिडा बिजौआव
आगान सुरबा

डिडाया थोर-बोर मावदोंमोन सैनाय,
बे मावनाया जोबोर जुदाथारमोन—
आं बिखा-बिख्लोखौ सोमावफानाय मोन्दोंमोन ।

डिडायाव आंल'मोन,
समआ खोमसिनिफ्राय खोमसि जाबायमोन ।
खानसि-गुमा गाबनायजों
गिथाव-बाथाव जासिनलांदोंमोन.....

आर् बेव सासे दंबावोमोन,
जाय खालि बैथाल' जावदोंमोन,
बिखौ आं दरसि-खोमसि भूतबादि नुदोंमोन ।
उनाव बियो लासै बुंदोंमोन—

'गथ', आं नोंखौनो नेदोंमोन'
नडाबा डिडा बारहोनाय समआ
दहायनो बारलांबायमोन ।'

बेनिफ्राय बियो सि थादोंमोन ।
बेफोर मा बुंनाय जादोंमोन
आं बुजिनो हायाखैमोन ।

ह्यालुरनि बिखायाव होमबा जेरावबो सिमोन
खालि बैथानि फाव-जाफाव सोदोबल' दंमोन ।

'मा बुंनाय जाखो आफा' —आं सोदोंमोन ।

'मानो—फुंखाया गैलिया, मैया थांबाय ।'

—फुंखाया बहा थांखो ?'

बियो बुंफिनदोंमोन—'मा खालामनो गथ' —

खाफालनि लिरनायखौ रावबो

फेलें खालामहाया,

फुंखाया मैया संसारखौ नागारलांबाय ।'

'फुंखा !!' होननानै खर'खौ सिथिब्राबनानै

आं हज्रिखावदोंमोन; खर'खौ सुबाव मोन्दोंमोन;

होमबा बोरि मोनफैबायमोन ।

डिडा जावग्राया आंखौ गोबादोंमोन

हामा हामा होननानै बुरखायदोंमोन !

'फुंखाया गैलिया, नाथाय फुंखाया मानो गैया जानो,

फुंखाया थाथारनांगौ' —बिब्दि बोलो फोरानानै

फुंखाखौ नागिरलाडो आं न'आव ।

नाथाय फैमाल ! फैमाल सुबुंनि लुबैनाय-साननाय !

फुंखा ! फुंखा !! होननानै गाबज्रिदोंमोन आं ;

फुंखाया सेडाखै । नाथाय—

फुंखाया गैलाया, आय' फुंखा, आय' आब',

आय' आफा—आय' शुनि खाफाल होननानै

सेदोंमोन गाबखाव-गाबसि—रिन्दाव-रिनसि ।

आं बन्थ' जानानै गसंनानै दंमोन ।

बेनिफ्राय आंहा मा जायामोन—बुंनो हालिया।
फुंखानि बिनानावआ खिन्थादों—
आं जलदब गोग्लैदोंमोन आरो
आंनि आखाइनि जिरातआ

गोग्लैलांदोंमोन.....

फुंखानि थाखाय लांनाय आपेल फिथाइआ
सिथ्लायव दुद्रुलांदोंमोन—
आंनि मिजिङ्का दुद्रुलांदोंमोन
दुद्रुलांदोंमोन..... !

हालिया आं रजे, सहायनो हालिया.....
(मासियाव जग्र'बो)

नोंबो आंखौ अनो सैनाय ?
आंनि गोसोखौ सुग्लायहोनो
गोलोमदै हुगारो। नाथाय नों मानो
फुंखाखौ बावनो बुरखायो ?
नों माब्रै बाव्जानो लुबैयो सैनाय,
बियो आंखौ गोथार गोसोयै
नाजावदोंमोन, अनदोंमोन
नाजावदोंमोन आरो अनदोंमोन
बिखौ आं बोरै बावनो हानो ?
हाया, हानाय नडा बावनो—
बै गडियानि दै-खुन्दायाव
डिडा जावग्राया बुंनाय आफोद-खौरांआ
जेब्लाबो गोजावफैयो।

आरो फुंखानि थैनायाव
आंखौल' दुखु जादों दासान।
दिनैबो खोनायो—

फुखा थैनायाव
दुखुनि बाना उसिफावदोमान
बे गुवार गामियाव.....
ब्रोसोरसेखालिनि गडियानि बाना
बुसारलांनायबादि।

जुलि ! मानो सिरि थाखो नों सैनाय,
नों रागा जोंबाय ?
दागि नों रजे, अनग्रा गोसोआ
थांनानै दडबा
नोंखौबो अननो हागोन आं
जेब्लाबो..... अरायबो.....

—*—

फोथायखेबस'

बै हाग्रामायाव अरू खामदों होननानै
बे दैमाया आंखौ लेंबाय थादोंमोन,
आंबो अरूखौ नुखाहरदोंमोन;
'थुदो' होननानै डिङायाव गाखोनानै
आंबो बिजों आगान सुरासै
अरूखौनो लुखोमोरनो होननानै ।

लामाया गोजान सौफैबाय
समआबो गोबाव जाफैबाय—

गोहोखौ खोमोरजोबनानै
जोंब्लाउ सानआबो आनज्रायलांबाय,
बुहुम आरो दैमानि बिखाजों
स्रो स्रो बार बारबाय..... ।

आरू बेनिफ्राय ?

—आंनि बिखायाव बादामालि खाबाय,
आंनि खर' साजों फालोसे दाउब' बिरलंबाय;
फोथायै गोसोजों

ह्वाब्राडाव गाखोनानै
आज्लं आज्लं नाइहरब्ला
नुहुरबाय आं, बै अरूआ
बेसेवा गोजानाव थाबोबाय;

दैमानि दैबूथिनाय लामाजों
आं आन्दायफैनांबाय ।

—❖—

एफा एफा

नुजेननायाव नुदोंमोन
नोंनि मेगनआ गोजों,
रायजेननायाव मोन्दोंमोन
नोडो इनाइनो गोरों ।
मोनथिगौ नोडो सैनाय,
आं लोगोफोरनि सिगाडाव
बाख्नायदोंमोन :

आं मोजां मोननाय सैनायहा दड
मै मेगन—मैदेर आगान
गोसोआ काजिरडा बागान ।
आरो रायलायनाया ?
बांआ बांआ, एरआ एरआ
मिनिनायफ्रा लोबआ लोबआ
मानो बिब्दिहोम्बा नोडो ?

आं जोहोलाव जालिया जानानै
नोंनि खाथि खाथि थांदोंमोन
नोंनि अननाय नागिरबायदोंमोन ।

नाथाय गोसोआ दिनै बुडो आंनो :
हन्थाया बिदिनो—जोंखौ आन्दायहोयो,
मैआबो मेसेबनानै खारो
मैदेरआ दालांखौ गियो
काजिरडानि गान्दायाबो खारखोमायो ।



फैमाल मिजिङ्क

थांनानै थानो सानस्रिनायाव
जों मोनबाय : जीउनि लैथोआ
बेसेबा गुवार आय'
बेसेबा गोलाउ,
आर्
मोनस'हायै नुस'हायै
बेसेबा गोथौ.....।

आरो लोगोआव :

बुसारलांनाय, बुग्दोलांनाय
बेसेबा गोरा दाहार,
बारनो हायै, फेजेनहायै
दोहौ आरो दोहौ
बेसेबा गोजौ.....।

आरोथ' दड :

बुजिमोनै, नाइस'नमोनै
दाहार बेलेन्दा
आरो सानथ्र'हायै
बाइहाजार फेस्थानि फाखन।

आं इनाइनो आन्दायदों सैनाय
आं इनाइनो मेंदों !
मिजिङ्कनि सेर सेर
मोनदांमोनै

बुजिमोनै
सानथ्र 'हायै फावनि दाहार ।
बेजोंनो जेननानै
गोहोआ गुगानानै
आंनि मिजिङ्गनि डिडानिफ्राय
आं नोंखौ फोजावहरनांबाय !
नोंबो नाडा-मिथिया
बुजिरोडै मिनिनानै
दिनै जुदा डिडाजों थांबाय ।

होमबा नों थांमारबाय ?
गोसोआ नाथाय दाबोनो बुडो
गोसोआ गोसोखौ नागारलायाखै
गोसोआ गोसोखौ दाबो बावाखै;
बेनिनो दुखुखौ सुसालानो
आंनि मेगननिफ्राय
मोदै बोहैदों आरो रेस् दोनलांदों ।

माब्लाबा नोंनि बिखानिफ्राय
दुखुनि दैमा बोहैलाडोबा
सोरजिना गोहोनि शमाय लानानै
एम्बुलुर दावहोहर अनजाली
एम्बुलुर दावहोहर !!



शोलेरनि हांमा

बेफोर सल'खौ गोसोखांब्ला

खालि गिथाव-बाथाव

बुहत आरो आंग्रोमोन्दानि

सल'वासो जाखांफैयो

खिन्थालांनाय गोदो आबै-आबौफ्रा

डिमापुर नोगोरखौ

रायखाडो जों दाबो :

बियो गोदो

बड'नि हादुंग्रा थावनिमोन !

देरहासाद जानानै

गोसो आरो मेगनखौ खेबसे

सोर् फिदिनानै नुबाय आं—

बेव दा थावनि गैलिया

बेव दा बड' गैलिया,

माखिजों बिसोरो बहाबा

खारखोमालांजोब्बाय

नडाबा थैजोबलांबाय

आर् डिमापुर नोगोरआ ?

बुंथिहायै दुखुखौ लानानै

आलाइश्री-आलाद'बी जानानै

गसडैनो दड.....

मेगनाव मोदै रथ' रथ' ।

मुगानिफ्राय मुगा गाबबोनायनि
जेर जेर मोदैजों
नोंनि मेगन सेराव
रिमिनला बादामालि खावाय !

हाया हाया गसंनानै
आथिं खुव खुब मोननानै
जावाय नों दिनै
बाइग्र'ब
जग्र'ब !!

स'नाया गोजोंमालाइ
बुब्बिलिजों हानो बोरै
गुगालांवाय
जलांवाय गोहोआ
गोमोरवायबो
महर-मुश्रीया !

दाखालिनि मुलुगनांगा दावहायावबो
थैयाखैसै नों,
आर दाबां—
थैनां गोसो गैया नों ?

मावा मिजिङ्ग दंवावो नामा आइयै,
दंवावो नामा मावा लुबैनाय ?
ना—
आंखौनो खर'आव खुंगुर ह'मनानै
हादर खुंग्रा जानायखौनो लुबैबावो नों ?

बेबादि सिमांखौ आंबो नुबावां आइयै
नाथाय सिमाडाव

हान्जा हान्जा सिखि-सिख्लाया
मुगैनायनि मिनिफैगारो
बुहुतआ दफा-मुंफा सिगिफैयो
आरो आंग्रोमोन्दाया
सानथ्र'हायै अर् फोजोडो;
बिब्दियैनो आं सिरि मोनफिनो
आर् नॉनि सायर' मुश्रीखौ नुफिनो ?

इयुननि बरातखौ मोनथिनो
आं फान्जामुथिबो नाइहोयो;
नाथाय बिसोर बुडो—

आंनि बरातआ
रेजें बार जानानै
ब्रबेबा बेलुनजों
बिरगारलांबायनो !

नॉंखि खिन्थाहागोन आइयै
बियो बिरलांखो बोरै ?



सिमांनि ह्वादर

खानासं बावसुली.
गिलुं गोसोनि सेर सेर
लुबैनायनि हुदा लानानै
ह्वादर सेनो नागिरनाय
थुंग्रिनि जोंख्लाव जोंबावो दाबो ।

जेनहां जेनहां गोसोआव
खासिया ह्वाजोनि अखा मोफ्लामो
रानसाव बिखायाव
चेरापुन्जिनि जुब जुब अखा हायो.
आं थांनानै थानो दाबो लुबैयो ।

खालाथिं नाइहरनानै
खासिया ह्वाजोनि अखा मोफ्लामनायखौ नुहरुबा
आं उसाव-बादाव जायां
गुरजां-गुरसि बिखायाव लुफावनो
आं लुबैयो दै-वाना.....
दै-वाना ।

बिडन-बिछपनि ग्रौ ग्रौ सोदोवखौ
खोनाहरब्ला साहारा शोलेरआ
रानसाव सालाइखौ दिहुन दिहुन
उसाव-बादाव नागिरवायो;
नाथाय बे सोदोवादि खाथिनि नडा
गेजेराव बेसेबा गोलाउ लामा;

बिडन-बिछपनि सोदोब

आरो

चेरापुन्जिनि अखा मोफ्लामनायाबो

आंनि खाथिनि नडा !

आं मोनथिगौ स'ना—

इजिप्तनि नील दैमा आर्

भारतनि जमुना दैमाया

दाहार सनदेरनानै

जेब्लाबो बोहैफेराखै,

आर् बोहैगोनदाबि ?

थेवबो आंनि गिबिर गोसोआ

सानफ्लाडो :

माब्लाबा गिदित बांग्रिं मावबा

बुहुमआ लेथेर-फेथेर जानानै

सनदेरबायाबि !

नाथाय बेफोर खुब्लाइ खाँनि

गुण-गोनां गुस्थिनिसो बाथ्रा;

खनसे सुफुंब्लानो सोर्गोनि

सिखि-सिख्ला मोसानाय !

—*—

आर'ज

आंनि बे थेर-बेथेर जालांनाय जीउखौ
आंनि बे लाथिख' जालांनाय जीउखौ
गोदानै सुजुनो होननानै
आबुं खालामनो होननानै
नोंखौनो हास्थायदों आफा
नोंखौनो अनसायदों आफा ।

गोलैयै हमदांहागोन होननाया
गोलैयै मोन्दांमोनगोन होननाया,
दिनै मानो गोजानसिन जाखो
दिनै मानो आनञ्जायलांसिनखो ।

आंबो सिमान जायो आफा
नोंखौ मोजां मोननो शमाय लानाया
दाबोनो जाफुंजोबाखै
आंनिनो गोसोनि बेरेखा फावआ
गोसोनिफ्राय बारनलाडाखै ।

थेवबो दुखुथिया जीउवा आंनि
जेनिबो गेजेन गोसोनि गेजेरजों
अरायबो नोंनिनो अननाय लुबैयो
अरायबो नोंनिनो अननाय मागियो ।



मोनै हांखो

(A Projectile)

बोदोरबावली बारजों हुब्लित्जानानै
आंनि बिखा साजों
बोहैलांबाय दोहौ दालाबसे
हांखायनाय आरो लुबैनायजों
आंनि सायर' मोखाडा
गाब गोनां जादोंमोन दसे ।

बिनिनो द'हायजों
नैबे ह्वाब्राडाव गाबथानानै
खुबैहरदोंमोन आं ह्वाथर नोंनिसिम;
नोंनि मोनदांथिया सिरि मोनदोंमोन,
लौगो लोगो,
गाबदोंमोन आरो बोराबदोंमोन :
उनाव—
मिनिस्लु मिनिनानै
बै रुगुंनिफ्राय
खुबैहरफिनदोंमोन ह्वाथर थरसे आंनोबो ।

नाथाय
आं खुबैनाय आरो नों खुबैनाय
ह्वाथरआ बोलांनाय हांखो,
नुनो मोना बहा थांखो,
आरो खोना मोना
बेनि सोदोबआ मा जालांखो;
—बेफोर गासिबो गेजेरनि राव ।

—❖—

गोरोबै देंखो

बै गोथैबारीने रुपुब्लि बिफानिफ्राय
बबेबा बावली बारजो
आइलि-जाइलि जानानै
बिरबोदोंमोन आलायखुनश्रीया
बे गोमजोर उदां ह्वादराव;
आरो,
गोदान जुलि जागोन
बबेबा सिध्लानिफ्राय
बेबे रेबे
गोम गोम
गोमखांबोनाय देंखोजों
बिनि बिरबोनाया जादोंमोन
आला-खाला
ख'हाबा ख'हाबा.....।

आलायखुनश्रीया बैखौनो खोनासंदोंमोन,
गोदोनि ना दानि,
ना देंखो देनानि
सिबाइआ मोनदां मोनाखैमोन;
बिनि सोरगिदिं मोनथिस'हायै
उरां-फारां सिगुन बिरदोंमोन,
आलायखुनश्री बिरनाय ह्वादरआ
गोथैबारीमोन।

बेनि उनाव
जोमै गैजारोडै

अन्जिमा राइजोआ
रेजेनिफ्राय रेजे जासिनलांदोमोन;
दाखालि अन्जाली गोमाजानाय
'बोहैला' बाराबो
बुब्ब्लिनि शमायखौ बावनानै
गोदान सिमां फेहेरबावदोमोन,
बेनिफ्राय
रावबो मोनथिया, रावबो खोनायाजासे
सिरि सिरि हासिंडै
बार मोदाय जानानै
माब्लाबानो आलायखुनश्रीखौ
बुख्लाइलांदोमोन !
आलायखुनश्रीया अन्जिमा राइजोनिफ्राय
गोमोरलांदोमोन ।

रैसुमै देंखोखौ दैबायबोनाय
बै बारआ दुखु मोनदोमोन,
आरो होनदोमोन—

'अन्जिमाया दिनैनिफ्राय
मोनदांथि गैजारोडै
लाथिख' जाबाय !'

—❖—

हाबिलास

नोंनि लुबैनाय, आर्
आंनि लुबैनायनि ह्वाब्राडा
ब्रुद् ब्रुद् गुगालांबाय दिनै लोगो;
सिमाडाव नुसनफ्नाडै
मोकथाडाव मोनदांफ्नाडै
बबेबा सिनाइयै अरन सेर सेर
जीउनि लामाया दिनै बोहैबाय !

आरो बेसे गोजान लोगो ?
लुबैनाया जानलांगोन आरो जानलांगोन—
बेसेबा गोजान, रिउ रिउ, रोमै रोमै;
आं गाबज्जिहरनाया
अन्जिमानी बबेबा ख'नाजों एरखेलांगोन
नडाबा मेंनानै लामा ससेयावनो गोमोरगोन;
आंनि लुबैनायनि
आंनि हांखायनायनि
आलारि-जोथिया
मोब्लिब-गोमोरले जानानै
नंखाय-गोहैलो बारजोंनो स्रोब गोमोरनांगोन;
आर् बेनिफ्राय मा जागोन लोगो ?
जीउनि लामायाव थाबायबाय थायोब्ला
गोदान बरात आरो गोदान खैफोद बेखेवनो
नुस'नै गोहोआ नुजाथिफैगोन ।

गोदोआ थांबाय लोगो
दा-आ दबरसे थागोन, आर् थांगोन,

आर देनांबो जोंजों नुजानानै थांगोन,
बिदिन्थाया गासिखौबो सानसे खोमोरजोबगोन;
जीबो मोनथाम मुगाखौ थ'फ्ला खाथ'बनानै
नुयैजों नुजाहैगोन ।

होम्बा जोंनि जाफुडै हांख्रायनाय
आर जाफुडै लुबैनाया मा जागोन ?

आं नडो,

मेगनआ नुस'नै मोनदांनाय ह्वादराव
(बिसोरो) नागिरज्जायबाय थागोन,
बबेबा बिरगोन,
बबेबा होसोगोन;
मोनदांनाय अखाडाव
बेफोर हांख्रायनाया
खोरोमखांगोन

आर

मोफ्लामगोन;

बेनिफ्राय—

लुबैनाय-हांख्रायनायनि
जुलि जागोन
बुहुमनि बिखायाव जुग जुग
अखा हागोन;

कीटस्नि जीउमाया बेखौनो नाइनानै

Negative Capability, Negative capability

होननानै ग्लाब ग्लाब मिनिगोन

आर आडो ख'ब ख'ब आखाइ ख'बगोन ।

—❖—

गोसो

सोरनि थाखाय थादों नों गोसो
दड नामा नोंहा सोरबा सैनाय
जायनि थाखाय नों गोसोआ
अरायबो इनाइनो हालाय-हाफाय !
दंमारो ना सोरबा गोसो
नोंखौ इनाइनो मोजां मोनो ?
आंलाय माथो नुवा बोरो
सासेनि उनाव सासेया खारो ।
गाबदों मानो रथ' रथ'
लुबैदों माथो गोसो-गथ' ।
गोसोआ लुबैब्ला गोसोनि फिथिखा
अराय दुखुआव गफ'बगोन मिथिखा ।
हास्थायनो सानदोंब्ला
सासेखौ हास्थाय
जायखौ बुडो जों
आनान ग'साइ ।
थायनो सानदोंब्ला
सासेनुव गथाय.
जानानाय नडा
हालाय-हाफाय ।
खोनास गोसो
कशीरनि ख'बाम
जीउआवे असया
ग'साइनिल' नाम ।

—❖—

मेरिना

—T. S. Eliot.

Quis his locus. quae
regio quae mundi plaga

मा लैथो जाखो बेलाय मा ह्वादर,
मा गोमो गाब, मा ह्वाजो, मा द्वीप
मा दैमानि दोहौ दानगारनाय
आरो माथो पाइन बिफां मोनामो,
खुवा खुनायनि गेजेरजों
हाग्रामा दाउसिननि देंखो खोनानोबो मोनो;
खिन्थानाय आइ,
मा साया-माया मुसुखा
जाखांफैयो आंनि मोखाडावलाय ।

जाय सैमानि हाथाइखौ उनगोन,
होमब्लाथाय थैखाबाय
जाय बिरबायारी दाउनि देरहानायाव
रंजाफागोन, बिबो थैखानाय
खाजानि सायाव ज'नानै दड जाय,
बिहाबो थैखानाय
जुनातफोरनि बावहाबनाय गेलेफुनाथाव
जाय मेगन सादों
बिबो गोथाडै थैखानाय
गोमोरलांनायनि राहा लाखाबाय
बारजों बिरखारहोखाज्राबाय

आरो बिसोरनि अननायजोंनो
 पाइन बिफानि हां लानाय आरो
 हाग्रा गेजेरनि बिरबायारी दाउसिननि
 मेथायआ गोमोरजोबबाय ।
 सोरनि मोखां जाखो बिलाय
 मोलेलेबो नुयो, रोखा रोखाबो
 आखान्थियाव थैबो बोहैथिदों,
 थैहांबो नुयो गोख्रों-गोख्रांबो
 अरायनि ना दान्दिसेनि ? हाथखि-हालानिफ्राय
 जानसिन आरो मेगननिफ्राय खाथिसिन
 नुबाय आं
 खोनाबाय आं नों रायज्जायदों बुदुं-बादां
 —मिनिस्तुबो मिनिदों बिलाइ मावनायनि
 सोदोब सेर सेर आरो खारफुनाय
 आर्थिनि सोदोब उन उन
 जेन' सिमांनि राइजोआव
 दैमा-दैसाया लोगो लाहैजोबदों ।
 नै जाहाजआ बरफखौ
 सिंखाउदों आरो सोदोब जादों—
 नै जाहाजआ गुदुंजों दुंखाउदों
 आरो सोदोब जादों ।
 बेफोरखौथ' आंनो खालामदों
 —आंनो बावदों
 आरो दिनै गोसोखांफिनदों
 बे मोनसेल' जुन आरो सेप्टेम्बरनि
 गेजेरावनो
 आंनि जाहाजआ सोरलाब जादों
 बेफोरनि गेजेरजोंनो आं

गावखौनो मिथिनो मोना जादों
मोनदां मोना जादों
आंखौ खोमानानै लादों ।
नै जाहाजआ सेरलांबाय
दुरुंसो नांगौ जाबाय
बे महर, बे मोखां, बे जीउवा
बिदिन्थानि राइजोआव थांनानै थानो
आंखौ गारनानै
थांनानै थागासिनो दड ।

होमब्ला आंबो—
बे जीउनि थाखायनो आंनि जीउखौ
गारनोसै;
आंनि बाथ्राखौबो
बे रायदावैनि थाखायनो
फोजोबनोसै ।
गोदान महरआ हनै गुस्थि गेवबाय
आरो आंनि मिजिङ्का आ दा :
गोदान जाहाज ।

आंनि जाहाजनि मोखाडाव
मा लैथो—मा ह्वादर
मा फुरगा मुसुखा
आरो मा बिरबायारी दाउसिनआ
खुवा गेजेर गेजेर
मेथाय खनबायो आइ ?



जीउ सैनाय

[गावनि art piece-खौ नाइहाबनानै]

जीउ-सैनाय आंनि !

नंमारगौ नामा

मानसिफोर बुंनायबादि

जीउ गैया नोंहा ?

आंलाय माथो

ecstasy moment-आव

नोंनिनो राव-फाव

खोनायो—नुयो :

मानसिफ्रा दाबोनो मोनथिमारा :

There are more things in Heaven and Earth,
Horatio, than dreamt of in your philosophy.

जायफ्रा जा-लों थायो

बिसोरनो नोंखौ जीउ-गैयै सानो

आरो नोंखौ जाय मुसुखा सानो

बियो आरो नोंखौ मा मिथिनो ?

जीउ-सैनाय आंनि !

मानसिफ्रा जायखि साना मानो,

नों थायो आंजों अरायबो

उफेले उफेले आंजों गेलेयो;

आंसो मिथिगौ—

नों आंनि गोसोनि sensor,

नोंनिनो आंगो महर होनो
आंदि जथायनांदों मोननो थाडै गाब
अन्जिमा-राइजोनि बबेबा
Distant deeps and skies-निफ्राय
आंनि sixth passion-जों लोहाबनानै;
आं नोंनि आंगो महरखौ नुथारदों
आं नोंनि transcendental गोसोखौ
मोन्दांथारदों ।

जीउ-सैनाय आंनि !
मानसिफ्रा जेखौबो मिथिनो हागौ,
नाथाय मिथिनाय नडा बेखौ :
नोंदि आंनि 'flesh of the flesh,
And bone of the bone ।'
नडाबा संसारनि सैनायफ्रा मानो बुडो
आरो मिनियो;
'बे फाग्लानि सैनाया दंफांथारसो !'

आं दुखुजों सिथिब्राबदों
बिसोरनि रावखौ सहायनो हाया जादों
आंनि गोसोआ मोजां मोननो हाया जादों ।
आं बे सैनायफोरखौ सिनायनो आद्रा गैया—
आं बिसोरखौ मोजां मोना,
आं बिसोरखौ सैनाय साना,
मानोना,
आंबो बे आजोला बोथोराव
संसारनि सैनाय मुंजों
थगायजाबोबाय ।

लाजिरोडै सिबाइआ
गावबो सोरजोंबा थगायजानानै
फैबावदोंमोन आंनि खाथियाव
आरो खेबसेबांव ।
लोगोआव रथ' रथ' मोदै
खुगायाव राव गोदै
बिनि मेगननि मोदै रथ' रथ'
आंनि थाखाय बाला रग' रग'
आरो बिनि जोंख्लाब महरआ
आंनि थाखाय जादोंमोन Ignis futuus
or will-of-the-wisp ।

जीउआव आं खेबसेल' थगायजायो सैनाय,
आर् मिथिगौ नों आं सोरखौ फोथायो ?
जाय आंखौ थगायफेराखै
खेबसेबो
गोरोन्थियावबो;
बेनिखायनो आं नोंखौनो
मोजां मोनो
फोथायथारो ।
मानोना जेराव मोजां मोननाय
बेवनो फोथायनाय !
हनै आंखौ सोरबाबा जावलीया बुंदों,
हनै आंखौ सोरबाबा
गोथैबारीनि बुहुत-फेथाजों
राव रायज्जलायग्रा बुंदों !
आंदि नोंनि लाइमोन महरखौ सुखां-थाखाय

निजोम थान आरो
निजोम बोथोर मोना जादों
बिसोर बेखौ मिथिया जादों !

संसारनि गोरों-गोराफ्राबो मानोबा
आंनि मोनदांथियाव सुब्रेहरदों,
लोगो लोगो
आंनि सानब्लाउरीया थोर-बोर मावखांदों ॥
बेनिफ्राय आंनि सानब्लाउरीयाव
खाना नांदों सैनाय,
आं नोंनिसिम थानो हाया जादों;
गोसोआ बाइग्लिजोबनानै
आं थादों गोग्लैनानै
नोंनि थानआवनो;
लोगो लोगो बे oblique moment-आव
साया-माया नुजाफैदों
आंनि आइनिनो महर;
आइआ मिनिखुसि रायदावफैदों :
'आफा, आंनि गोमानाय
बोरमा खासि बेमाया बेनोथार !'
(आं बाइगर समाव
आइनि बोरमा खासिया
गनद्रानिफ्राय गोमादोंमोन,
आइआ इनाइनो दुखु मोनदोंमोन;
आरो आइखौ खुसि जाथों नंनानै
लेखा खाइलाबाव बे बोरमानि
महरखौ दिखांनानै
आइनो खिन्थादोंमोन—

आइआ मिनिस्त्रांदोंमोन ।)

बेखौल' बुंनानै

आइनि महरआ गोमोरलांदोंमोन,

लोगो लोगो बे oblique moment-आव

धियान सिफाइगोदान

सोरबा जटाधारी साधुआ

नीलाचल ह्वाजोनिफ्राय दावबायनानै

आंखौ नाइहाबनानै

कमण्डलुनिफ्राय दै शान्ति लानानै

आंनि मोखाडाव सारसि सारंसि

बुंदोंमोन खेबथाम :

arise,

move,

artists are appreciated by the few.

अब्लानो आंनाव

गोदान गोहौ बोहैबोदोंमोन !

आं फोथायो सैनाय,

नोंहा जीउ दंथारो,

नडाबा मानोथो

नोंनि बाउली महराव

गुरु नन्दलाल बसुआ बाग्दावखांदोंमोन,

बिथाडा मानोथो नोंखौ नाइहाबनांदोंमोन !

—*—

हाइना गाब

आंनि गोसोनि गोर्बोआव
रावनोबो खेंफोरै
लामा-दथानि जारिमिन दड सैनाय,
जायखौ नोंबो एरखेलांनाय बुळ्लियाव
खोनालाडाखै ।

नों थांबाय, आं थाबाय
बुह्मनि बिखायाव जों जाबाय
सेरखाय-बेरखाय;
नाथाय दिनैबो बेखेवआखै आं
सानख'बिलाइयाव मा थाखो मा थालांखो ।

दाखालि दुफां बारआ खिन्थालांदों नाथाय
नों थालांबाय आंनि गोसो-ह्वादराव
बोथोर-बावलीया बार जानानै;
मानोना दाबो—
हाइना-बेरसां मेगनजों
नोंनि हाथाइ रिजि रिजि सेर सेर
बिरफुंबोनाय हाइना-मुलिया स'ना
आंनि गोसो-जोमैयाव
अखा मोफ्लामहोफैयो ।

—*—

गांसे लाइजाम : बिजय बाग्लारीनो

बै ह्वाजो खंखरनिफ्राय
मानो दावबायबोदों फंबाय ?
गंसेनि उनाव गंसे दरआव
मानो नारहैदों;
सासेनि उनाव सासेन्याव
मा सोंहैदों,
फंबाय, नों मा नाइगिरदों ?
बे ह्वायेनाव मा नांगौ नोंनो—
ना, लुबैदों गोदानै सोरजिनाय
उदयाचल एबा छबिराम नामनि छारानि
गोजाम जावलीया ह्वादत्आव
ग्रें ग्रें राइजो जानो ?
नाथाय खोनादों आं—
मणिराम बांगाल-लागोआ
बे ह्वादत्खौनो चर एरिया होननानै
बावखुंग्री ह्वाजोसिम हाग्रा एउबोबायनो !
छबिराम नामनि छारायाबो खोनाबायनो
जावलीया देवाननि ताम्र-पत्रआबो
बिमला प्रसादखौ साउनायाव साउफादोंनो !
बेनि बिथं रावखौ नाथाय
बिथां रूपनाथनावसो
सोंहैनांगोन,
मानिबा दिखाराव
बड़' राजाफोरनि बेगें-बेलाखौ
कटन कलेजनिफ्राय खावनानै

बेंतलाव खारखोमालांबाय ।
 उदयाचल राइजोआबो
 मिचिं-बड'लेण्डजों
 सीमानि गण्डगल जानानै
 आदा रनेनजों सिफाइजाबाय ।
 नों बहा थाबावनो फंबाय ?
 गोसोनि दुखुखौ होखारनो
 बाथा-बिबुंनि देंखो खोनासंनोबो
 बिबुंआ गेरेबथारबाय !
 गोसोखौ सुग्लायहोनो
 बागानसालीयाव स्वोरां आफादखौ
 खोमसि मोदायजो ह'राव लाबोनानै
 मन्जुखौ मानोथो दुखु हरखो !
 नों मिथिया फंबाय
 कहिनुर थानानै मन्जुनि थाखाय
 जों मानो फाग्ला जानो ?
 आरो माबाफोर मिथिनो माब्लाबा
 आदा प्रजिनाव मानो थाडा !
 मिथिया नों—
 बै शान्तिनिकेतननिफ्राय मोनबोनाय
 रबि ठाकुरनि दारि दोंसेखौ
 गण-संग्रामनि खुरै-गाद्रायाव
 खोमानानै लाबायनायखौ ?
 बे गनायखौ आदा शीतलायाबो
 नुथारदोंमोन ।
 नाथाय मुबुं-मुसिजोंनो
 बिबो बावलांदोंमोन ।
 माब्लाबा सोंहैब्ला आदा शीतलाया
 लाउथि खेंखाइ सिबनानै

फिननो हागौ माब्लानि बाथ्रा बेलाय ?
माब्लाबानि बाथ्रा सोंनो
आर नों लाहारी सारनाव
थांबावनांगोन ।

सारआबोध' सुंथाबै बुंगोन—
'Pen is the mightier
than the sword'.

माबाफोर जादोंबा
नीलकमलनो खिन्थाहैथां,
सुंद' सल'जों फोरमायथारथों ।
डैमानि फिसा डिमासा
जगदीश बाबुनाव थांनानै
नोंनि एफा एफा
बिनि एफा एफा
सुनाय सुनाय बाथ्रा
रायलायनाया बुंनो थांडोब्ला
'एपार बांला' 'अपार बांला' ।
माथो नुखो नोंलाय
सिख्ना जाहारनि नौ-नोगोरावलाय ?
थेवबो नाथाय
प्रम'द बाबुनि शोदोब-बिहुडाव
शोदोब गैया ।

मोखां दासोम फंबाय,
बे राइजोआव फैनानै रावबो
ओरैनो थांनाडाखै,
मानोना—
आदा रनेननाव थांबोला
बियो सोंथारगोन
“फंबाय नोंनो साख्रि नांगौ नामा ?
साख्रिनि बेपाराव नाथाय

चरण बाबुवा आखाइ-खान्दा”

बेनि उनाव आरो

आदा समरनाव थांजाथारला ।

इसे आगु फैयोमोनब्ला

नों नुगौमोन फंबाय

बड़'नि थाखाय

सुखे रन्जितनि खानाइया

बेसे थिया थिया,

जायनि खाथियाव

ग'बायाबो थावरि हाया ।

आदा कमलनाव खेबसे थांनाय फंबाय

बेवबो खोनागोन नों—

बिजाब लिरनाया मोकथांब्ला

बड़' चिनेमाया गोजान सिमां ।

करेन-डम्बरुनाव

सोंनोबा सों—

Politics is beginning

or ending ?

नाथाय बाराखौ मानो थांनो—

लोगोआव अराय लाफा

जाबा दाजा ब्रजेन आदा,

आंनाव हले दाफै फंबाय ।

मानोना—

बोसोरनै न' भारा लानानै

स्वाननैल' उन्दुग्रा

आंबो सासे नामदांखा ।

—*—

* मणिराम बांगाल—बांगालजों खांजानाय सासे बड़'सा ।

* बाथा-बिबुं—प्रिन्सिपाल फणी ब्रह्म ।

* ग'बा—अमृतलाल बसुमतारी ।

* प्रजि—प्रसेन्जित ब्रह्म ।

आंनि थैनाय सैनाय 40

गुरुनि मोनसे प्रबचन : अन्जालु प्रबननो

दाखालि आदा ब्रजेनआ सोंदोंमोन :

मोनाखै नों मोनसे 'समन' ?

—मोनसे 'समन' ? मा 'समन' ??

औ ! मोनसे 'समन' — 'प्रबननि समन'

अन्जुआबो सोंदोंमोन :

नों प्रबननि गुरुदक्षिणाखौ मोनबायना ?

मोनबाय—अन्जालु सोलोंसानि गुरुदक्षिणा

AK-Forty seven-खौ ।

नाथाय आं बुंस'हाया जाबाय—

बेखौ मोननानै आं गोजोनखो ना गिखो !

मानोना,

जों गुरुफ्रा सानफ्रामबो

AK-Forty seven-निफ्राय साबसिन-हामसिन

गुरुदक्षिणा मोनगासिनो दड ।

दा आन्जादनि बोथोर प्रबन !

नोंहा गोसो दंब्ला फै आरो नाइफै—

Examination hall-नि desk सा सा

बेसे समाइना समाइना Model Book लानानै

गुरुफोर फोरोंनायखौ नंखाय खालामनानै

आरो बिसोरनि existence-खौ nowhere खालामनानै

Question and Answer नाइगिरदों आरो लिरदों !

नाथाय बिसोरनि Answer script-खौ बे गुरुफोरानो

नाइदों आरो मोनदों—See at page 201.

गुरुआ साननो गोनां जादों—आंनि खर'आ गात्रि जाबाय नामा

मानोना Answer script-आथ' 201 page-नि नडा !

नाथाय बेवबो मोनसे गाहाम खौरां दड प्रबन !

जोंनि दैदेनगिरिफोरा दा बिसोरखौ लानानैनो

Master Race दानो सानदों ।

दा बेखौनो सानदों आं—नों होनाय गुरुदक्षिणाया

बिसोर होनाय गुरुदक्षिणानिफ्राय

जेब्लाबो साबसिन जानो हाया

जेब्लाबो देरसिन जानो हाया ।

बेनिखायनो—

नोंनि AK-47-आ आंनि थाखाय जेबो नडा

आंनि खाथियाव बेहा जेबो ओंथि गैया !

बिसोरनि गुरुदक्षिणाया

एकलब्यनि आम्दा-आखाइनि

आसि-बिमानिफ्राय साबसिन-हामसिन ।

अन्जालु प्रबन ! नोंदि आंखौ सोंदों—

सारआ माबाव खारखोमालांदों ?

आं सोंफिननो सानदों—

बेयो मोनसे vox populi ना private entrepreneure ?

ना नोंबो आदा हरिभूषणबादि (श्रीमती दुल्लाइनि लिरगिरि)

बुंनो सानदोंनामा—You are a criminal.

[आंलाइनो थुनलाइनि गोरों-गौराथार;

थेवबो थुनलाइनि जेबो मावथारा—

बेनिखायनो criminal]

नाथाय नोंसोर जाम्बा मानसिखौ नुनानै मानो इसिबां हमो ?

नोंसोर बुंनायलेखा गावखौनो गोरों सानफ्रानानै

नैबे जाम्बाया सोरजिदोंमोन 'सान्दो बावदिया' आरो 'जिउनि अलंबार' ।

नाथाय थुनलाइनि लेखागोरों अनिल बर'मोनहा

बेफोरखौ बड' थुनलाइनि स'नाफिथर होनमालाय मा जानो

सोरबा सोरबा गेदेना थुनलाइनि जारिमिन लिरगिरिनि

आंनि थैनाय सैनाय 42

खाथियाव बेफोर जायगा मोना ।
 बिजाब सेबखांनाय समाव आदा ब्रजेनआ सोंदोंमोन—
 नों बेसेबां copy सेबखांहोखो ?
 आं दुगा दुनानै बुंदोंमोन—फुरा हाजारथाम !
 आदाया दाद्रि होदोंमोन—धेत् एफा बुरजा बड़' गैया,
 बड़'नि अन्जिमाया हाजारसेल';
 आरो दा गावजों गाव गावथारलायनानै
 हाजारसेयाबो थानाय नंलिया ।
 अब्ला आं सोंफिनदोंमोन—
 अब्ला आदा, बड़'फ्रा सोरखौ लानानै
 Bodoland दानो सानदों आरो Sovereignty लुबैदों ?
 अब्ला आदाया रागा जोंसिनदों आरो बुंदों—
 आं मिथिया, आं मिथिथारा
 बेफोर बाश्राया आंनि खर'आव हाबा ।
 आरोबाव—
 हाया हाया, जाया जाया—जाम्बा-जाम्था
 [बयबो गोरों-गोराया बिसि-फिसाखौ नागारलांनो हायैयाव]
 फंबाय बिनेश्वर (बै समनि नेहाथारि, बड़' थुनलाइ आफाद)
 थिनहरनायाव थांनाय जादोंमोन Mysore-आव
 लोगो-लोब्बा जानानै बड़'नि रावबिहुं हुंहेनो !
 बेनिनो बड़' थुनलाइ आफादआ मानबिलाइ बाउनायखौ लानो
 जों जेब्ला आगयलांदोंमोन
 बे समावनो बड़'नि सासे गेदेमा लिरगिरिया
 लामा गास' गास' जोंखौ रायदोंमोन आरो रायदोंमोन !
 [आंजों लोगोसे दंमोन—रामचरण जाम्बा, दलेश्वर जाम्बा,
 मेघनाथ जाम्बा आरो ब्रजेन जाम्बा] ।
 प्रबन ! जों जाम्बाफोरखौ लानानै नोंसोर बड़' intellect-फ्रा
 बड़'नि हाथाइसालियाव मानो इसिबां Magic-Show दिन्थियो !

नोंसोर Bodo-intellect-फोरनि जोबनोरोडै episodes दड प्रबन !
बेनि मादाव मोनसेल' खिन्थानोसै आं ।

थुनलाइनि गुदि खौरांखौ मिथिनो हास्थायनानै
आं जेब्ला M. Phil. फरायहैयो,
अब्ला सोरबा सोरबाया हग्दावहरदोंमोन—
बिहा M. P. जानायनि मतलब दड,
नडाबा बियो मानो M. Phil. फरायहैनो ?
बेखौनो बुडो—कहाँ हरिद्वार, कहाँ गुह्यद्वार !

आदा हरिभूषणआ आंखौल' criminal होननानै मा जानो,
गावबोथ' मानोबा बड़' intellect-नि बिथिंखौ एरखेनानै
Deforestation जानाय कचुगाँव रिजार्भनि
दंफां दालाइयाव Bodo-intellectual world-नो
गोदान जीउ होनायनि सिमां नुदों !

आंबो मोनसे गोदान सिमां नुदों प्रबन !

थब्ल' थब्ल' देरहाबोनाय बे गथ'वा दा

मोनसे गोदान सिमां नुदों—

बियो आरो दाब्ले खासेवजों जुजिनायाव

दान्दिसेबो उन्दुथारलिया

आरो रिप-भान-उइंकलबादि उन्दुनायनि अनगा

रत्नाकरबादि आन्थोरजयै धियान खालामनानै

सासे गोदान बाल्मीकि जानायनि गोदान सिमां !

आं बैसोरबादि खारखोमालांनाय नडा

जाय बड़'फोरा

माखौबा गिनानै बै मेघालय कयला-ह्वाखराव हाबहैनानै फैफिनरोडाखै;

एबा

बेतन बारा मोनगोन होननानै

अरुणाचल ह्वादरसायाव रुवाथी थाहैनानै

गावनि गाननायखौ गानाखै

गावनि रावखौ रायाखै ।

आं बेवनो दड प्रबन !

आं नोंसोरजों दड—धोरोमखौ लानानै !

नाथाय धोरोमआ आंनि थाखाय Russel साननायबादि

Moral code-ल' नडा प्रबन;

धोरोमआ आंनि थाखाय मोनसे life and lift.

(जीउ आरो जौगाथि)

बेयो आंनि थाखाय नडा मोनसे जोबथा plot.

नाथाय being and becoming-नि जोबरोडै plot.

जेराव Rock of Gibraltar ever evolves

धोरोमआ आंनि थाखाय नडा हिन्दु, मुसलमान, बौद्ध, खृष्टियान

नाथाय बेयो आंनि थाखाय

जीउ जौगाथिनि गोगो बिगियान ।

बे बिगियानखौ लानानै आं आगान सुरदों

गामि गामि बेंगुरा हारिखौ गोख्रों खालामफिननो ।

गिदिर गिदिर intellect आरो philosophy-खौल' लानानै मा जानो प्रबन !

दाखालि मङ्गलसिं हाज'वारीयाबो 16 नबेम्बरखालि

दाइना बुथारलायनायखौ

दुखु खालामदों ।

दा बेनिखायनो बुंनो सानदों प्रबन !

नोंनि गुरुदक्षिणा महरै

आंनो बाउहरनाय AK-47 हा

जेबो ओंथि गैया

जेराव जों नुबाय

बड़'नि सोमावसारनायनि jurisdiction-आ

दासान्दि गावजों गाव बुथारलायनायल' ।

—*—

तथागतनिसिम मोनसे फोरमायहरनाय

नै तथागत ! नों संसारनिफ्राय
थांखांनायनि उनाव

धोरोम राइजोआव
दुथां अश'कआ
मा फोथायखेबस' हाबा

मावलांदोंमोन—

बैखौनो फोरमायहरनो सानदों
आं !

नाथाय मोनसे खावलायहरनाय
थाबाय;

बे दुथांनि हाबाखौ खोनानानै
नों जेन' अंगुलीमालखौ खेमा होनायबादि
खेमा होआ !

नै तथागत !
दिनै भारतखौ बुद्धनि भारत होनलिया,
दिनै भारतआ बुद्धनि भारत नंलिया;
दिनै भारतखौ होनो—अश'कनि भारत !
उदां भारतनि फिरफिलायाव दिनै
अश'क सोरखि,
आरो अश'क सोरखियानो दिनै
धोरोम-नेसोंन !

नोंनि गोसोआखि गनायनो हागोन ?
नै तथागत !

दाहालागै उपगुप्तआ नोंनो खिन्थाहैबाय
जानो हागौ—

दुथां अश'कआ सम्राट जानायनि

सिमांखौ मोकथां खालामनो

गावनि जौसे बिदा-फंबायखौ
दान्थार-सिथार खालामनानै
फोजोबस्रानायनि उनाव
जेब्ला राजउलाफादखौ मोनो,
अब्लाबो बिनि-दुथां गोसोआ
कलिङ्ग-राजखुंग्रीखौ हास्थायनानै
मोनैनि जाहोनाव
'दैया' दैमानि सेराव
खेबले खेबले दावहा
जुरिनायनि जाहोनाव-
रौनिया-हान्जाया थैजोबदोंमोन
सेंग्रा जालाइफोरा थैजोबदोंमोन !
थेवबो अश'कबादि दुथां मानसिखौ
फिसाइ बरायनो हाया होननानै
दैया सेराव
अर् ब्लाउ ब्लाउ फोजोनानै
बारसोमदोंमोन
कलिङ्ग-राजखुंग्रीया !
नै तथागत,
बे बाथ्राखौ जों बावनो हाया
आरो नैबे बाथ्राखौबो
उपगुप्तआ नोंनो खिन्थाहैबाय जानो हागौ;
दुथां अश'कनि उदखारि आखुआव
बिग्रायखानानै जेब्ला
ह्वादरनि दुलाराय नौ-नारीया
बेरेखा गसंथिनो थियारि जायो,
अब्ला मोन्थोरगोराफ्रा मोन्थोर होदोंमोन—
'सम्राट अश'क !

दानिया नॉनि मोखाडाव मोनसेल'
राहा दंसै—

उपगुप्तनि आधिंआव खर' गंग्लाइहै।'
दुथां अश'कआ बेखौनो खालामनायसै
आरो दान्दिसेयावनो The Great जानायसै !

नाथाय नै तथागत,
बाथ्राखौ जों दाबो मानिनानै लानो हायाखै।

मानोना, बे The Great-आ
बे समनिफ्रायनो धर्म्मराज जानानै

उपगुप्तखौ बोथ्रोत्नानै
धोरोमनि आन्दोआव दोनो
आरो गावनो गुरु जाबोयो !

बेल' नडा तथागत !

गावनि बेरेखा बिग्रायारी जाजानो गिनानै
धर्म्मराज अश'कआ

खान्दानी सेंग्रा-सिख्लाखौ
खानाइ सिनै सिनै

बौद्ध भिक्षु-भिक्षुनी खालामनानै
गावनि राजखान्थिनि निदानखौ

सां खालामनायखौ

दिनै बयबो बावजोब्बाय,
जारिमिनारीफोराबो दा आवबा जाबाय।

जों मिथिया,

गोसो जानाय, गोसो जायै

बयखौबो भिक्षु-भिक्षुनी खालामनाया
नॉनि थांखि नंगौ ना नडामोन।

नाथाय—

बेखौबो जों खोनानो मोनबाय

खायफा भिक्षु-भिक्षुनीफोरा
गावबा गाव अन्जालु-अन्जालीखौ
सं दानलांदोंमोन

बौद्ध बिहार बिाहर ।
बौद्ध बिहारफोरा जानानै फैदोंमोन
बै समनि Hollywood एबा Bollywood ।
नोंनि 'गेजेरखान्थिया' जानानै फैदोंमोन
मोनसे irony.

दिनै भारतनि उदां अख्राडाव
फिर फिर बिरनाय फिरफिलाया
जों जाम्बाफोरखौ आन्दायहोदोंब्लाबो
दैया दैमाया दाबो
सैथोनि सा जानानै
गसंथिनानै दड ।
नै तथागत,
जाय बिदाबाव कलिङ्ग दावहा जादोंमोन
बे बिदाब सेराव लुनानै दोननाय
नोंथानि मुडै लुनाय
दैया दैमा सेरनि बौद्ध मन्दिरआव
दाबो दै मोनलोडा !

नै तथागत !
नोंनि भारतआव दा
बौद्ध धोरोम गैलिया
दड खालि ह्वाजो खरं खरं
खारखोमानाय बौद्ध भिक्षुफोर
दाननाय नोंथानि मुसुखा
आरो नोंथानि बाणी !

—*—

जुगे जुगे कुरुक्षेत्र

कुरुक्षेत्र आव धोरोमनि दावहा जादोंमोननो ।

नडा, ह्वा-सिमानिसो दावहा जादोंमोन—

बिदा-फंबायनि बाइ-बाहागिनि;

दावहाया दाबो जागासिनो दड ।

जुगे जुगे कुरुक्षेत्र ।

बेसारा धोरोमसुला जुधिष्टिरआ

गाबामोखां जानानै बिफैफिनदोंमोन—

राइजो नडा गावसिनि ह्वा बाहागोखौ :

गामि मोनबा, खालि थानोआन्था ।

दुर्ज'धनआ बुंदोंमोन :

गैया बाहाय—गामि मोनबा

ह्वाबो मोना नों, बिजिजों सुखांआन्था ।

थेवबो शिबु चरेनमोनहा ह्वा बियो

ह्वाखौ नांफिनगौ होननानै

सानसुमाया राजानि ख'साब गाननानै

हसिखावो ।

नाथाय बाजपायिया बुंदों—

'आपलोक क्यों चिल्लाते हैं ?'

कुरुक्षेत्र आव दाबो ह्वा बिनो थाडो

कुरुक्षेत्र आव दाबो दाक्हा नाडो ।

रागाजों भीम-अर्जुनआ बुंदोंमोन—

मा जायो जाथों दावहाखौ नांदिनि ।

धोरोमसुला बिदाया बुंदोंमोन—

आंनि थैनाय सैनाय 50

नडा बाहाय—दाथ' ceasefire दड।
अ' बिदिखायनो राइजो बिनो Boat Club-आव थांदों—
सम मोननायखाय India Gate-आव
थाबायहैदों।

जोंबादि aspiration गैयै लोगोफ्रा बुंदों—

लाभ गैया नोंथां—

दाथ' कुरुक्षेत्रआ दिल्ली जाबाय,
माबेबा शान्तिबन, माबेबा पाहारगन्ज,
श्रीकृष्ण रथ दोननायाव Parliament House जाबाय।
बेवथ' सामब्रामनि बेसेन बांनायनिसो

खमलाय-खमसि जायो।

थेवबो कुरुक्षेत्रआव दाबो दावहा जायो :

जुगे जुगे कुरुक्षेत्र।

—*—

गोदान इयुननि मेथाइ

नोंनि साननायजों सोलियैनि ग'साइ
जुग जुग गोरोन्थि जाबोगारबाय;
बे गोरोन्थिजों दिनै
मुनुष-मैयाया दुखुआव गफ'बफैबाय !
गियान होदो ग'साइ
नोंनि साननायजों
जों गोरोबना सोलि हानाय— ।

नोंनि लुबैनायजों सोलियाखै ग'साइ
जोंनि दुखुआव नोंखौसो
होबोबाय दाय—

निमाहा होदो ग'साइ,
दुखुमानिया नोंनि साननायजों
गोरोबा सोलिबोनाय ।

सिरि मोनखांहोदो ग'साइ
जों जेन' साननो हायो—
इश्वोरआ सानो—मानसिया सिफाइयो ।

—*—

मेलेमजीबि

मोनसे अलखद अहानाय समाव
सोरबा फैनानै
गोरा सोदोब जाजासे
रिं होफैदोंमोन
आंनि दरखडाव ।

आं सिरिजाहाद जानानै
गोसोआव बोराबनाय लानानै
नाइफैदोंमोन आंनि दरखडाव ।

बोराबनाय गारांजों
सोंदोंमोन सिनायहायै मानसिखौ
'सोर जाखो नों ?'

नाथाय बियो मिनिस्लु मिनिनायजों
फिन होदोंमोन—
'रावबो नडा बाबु !
आं बिबायारीसो !
आं सानदों
रिंखौ आंबो दामजायो !'

आंनि खुगानि रावआ गोमाजोबो !
बिदिनो गुबुन समाव
दरखडाव जिरायबाय थानाय समाव
गुबुन सासे बिबायारी फैदोंमोन
आरो बिदोंमोन—
'बाबु आंनो भिक्षा नांगौ ।'

आं न' सिडाव लाइनानै
आदलि मोनसे जासिब्ला
बिबायारीया बुंदोंमोन—
'बाबु ! बेयो दानि मार्केटआव
खमद्राय जायो ।
आरो इसे बुरजाखौनो हर बाबु
मानोना सम गैया आंहाबो
फैबाय थानो ।'

आंहा बुद्धिया गोमाजोबो !
गुवाहाटीयाव थानाय समाव
सिमलागुरी restaurant-आव
Super Bus थाबथाहैब्ला
सासे बिबायारीया हाबहैनानै सोंहैदोंमोन—
'बाबु खुसरा फैसा दडनामा !'
सोरबा बाबुवा बुंदोंमोन—
'नोंनो मानो खुसरा फैसा नांगौ ?'
बियो थब फिनदों—
'बाबु, आथिखालाव बाबुफ्राथ'
खुसरा गैयैनि जोंनो भिक्षा होला ।'

—*—

गिबि मुंखलं

बै ह्वाजो सेराव
अख्रानिफ्राय माबा मोनसे रौ-रोथोन
गांलाब गोग्लैनाय नुहरनानै
बेथिं खारलांनानै खाथिसिम सहैब्ला
नुनो मोनदोंमोन आं
जटायु दाउमाया
ह्वायाव ओलैस्रो गोग्लैनानै दं ।
अब्ला बेवहाय गोबां गोमोहाबग्राफोर दंसैमोन ।
मा जादोंमोन—मा जादोंमोन होनना
बाइब्रुस् सोंनायाव
जटायुआ मेगन थाइनैखौ बेरलाव खालामनानै
फिनदोंमोन—
राइजोफोर ! बेयो मोनसे गेदेर जाथाइ !
दुथां राबनआ
आइ सीताखौ खावनानै
रौ-रोथोनजों खोलाहा लांबाय ।
होमब्ला नोंसोरखि खोनायाखै
सीतानि आनानि-बिनानि गाबनाय ?
बिखौनो होब्थानो होनना
आं जुजिदोंमोन दुथांजों नारा-नाथात्
होब्थानो नाजादोंमोन हाया हाया !
उनाव बिजोंनो गांखंआव दानख्र'बजानानै
गांलाब गोग्लैनायसै आं ।

“हाबाब, मानोथो राबनजोंनो

हाया हाया जुजिबायासै !”

बांसिननि खुगानिफ्राय ओंखारनाय राव बेयो ।

अब्ला जटायुआ मेगन थाइनैखौ बेरलाव खालामनानै
गोरा रावजों फिनदोंमोन—

इनायखौ माबोरै सहायथारनो थिनो नोंसोरलाय

इनायखौ होबूथानाया हानाय हायैनि मा बाथ्रा बेलाय

बेनि थाखाय मा उनफिन-सानफिन साननाय ?

नोंसोर बेखौल'नो गोसोआव ला—

आंनि मुडा जादों जटायु

बे गेदेरथार जाथाइनि आयु !

आं जादों सैथोनि थाखाय

मिथिखा हसिखा जीउ गारनो अंखारनाय

अराय फैगौ समनि

गिबि मुंख्लं

गिबि स्वहीद ।

आंनि खाथियाव हानाय हायैनि बाथ्रा गैया

बे जुजिनाया जादों आंनि जीउनि

right spirit and right action.

बे थांखिया जादों दधीचि मुनिआ

धियानआव मोननाय

गोगो गोथार गियान ।

आंनि बे जुजिनायाव दं

गोथौ-गोगो मोनसे ओंथि—

बे जुजिनायजों रामनि नाडागोदै गोसोआ

मोनगोन सुथि

बीर हनुमानआ गावनि लान्जाइनिफ्राय
लाउसिन समाइ लागोन
सती सीताखौ रैखा खालामनो ।
गोसोआव ला राइजोफोर !
जुगे जुगे राबनआ फैगोन
जाथाइनि आयु बे जटायुआबो
फैबाय थागोन
मुंख्लंफोरा अन्जिमा गैयै जागोन ।

—*—

गुदि बोसोनगिरिफोरनिसिम

नै बड़' हारिनि गुदि जोहोलावफोर.
नै बड़' हारिनि गुदि जोंलारिफोर,
नोंसोर सिनायबोदोंमोन सोरजिगिरिखौ
नोंसोर सिनायबोदोंमोन—

मानसि हारिनि दोहोरोमनि लामाखौ
बोराय बाथौ एबा दोहोरोमगुरुखौ

गुदि खालामनानै

नोंसोर खांबोदोंमोन मानसि हारिखौ
नै सानथ्र'हायै बड़' बोरायफोर !

(पुराण पुरुषफोर)

बाउहरो आं आंनि गोसो-गोर्बोनि
गंग्लाइनाय नोंसिनििसिम
नोंसोरनो खिन्थालांदों

सोरजिगिरियानो आजायग्रा,
सोरजिगिरियानो खांग्रा,
सोरजिगिरियानो बाग्रा,

नोंसोरनो फोरोंलांदों—

बाथौनि बान्दोआ बान्दोबा

(दोहोरोमनि खान्थिया मोनबा)

नै बड़' बोरायफोर !

(नै पुराण पुरुषफोर)

जों नोंसिनि बे फोरोंनायखौ

सुख'हाया;

जों नोंसिनि बे फोरोंनायखौ

सानस'हाया ।
नै बड़' बोरायफोर !
नोंसोर जोंनि थाखाय
दा बेसेबा गोजान,
दा बेसेबा गोजाम,
बड़' बोरायनि सल' एबा
(पुराण काहिनी)-फ्रा दिनै गोमोरनानै
मानसि हारिया
जीउ-जौगाथियाव ग'लाम जाबाय
बेनिखायनो मानसि हारिया
मोनसिसिं बोराय (पुरुष'त्तम)-नि
मुं खारिफिननांगौ सम जाबाय ।

—

सोदोब

सोदोब नों आय' रजे !

सोरजिनि गुदि नों

सोरजिनि रोदि ।

सोदोब नों आय' रजे !

सोरजिगिरिनि गोसो नों

सोरजिगिरिनि गोहो !

सोरजिगिरिनि साननायखौ

महर होबाय नों अराय

संसारआ समाइना जाबाय ।

सोदोब नों आय' रजे !

सोरजिगिरिनि लोगो नों

सोरजिगिरिनि गुदि देंखो ।

गावनो सोरजिनानै

गोसारनानै थाबाय नों

सोरजिनि बिजों जानानै ।

सोदोब नों आय' रजे !

नोंनो गोथार

नोंनो गोगो

नोंनो अराय निस्थार ।

—❖—

बे माइनाव नोगोराव आंबो फैयो

बे मोनसिंसिं बोराय सिं बोरायनि गामि
सिंबोर गामि

माइनाव नोगोराव माइनाव बोखांनो
बइबो फैयो;
आंबो फैयो;
माइनाव बोखांनो ।

सल'बाथा जालांनाय जारिमिन मुगानि गिबि
बड़'नि राइजो जानायाव जेब्ला
अलखत् सम फैदोंमोन—
सान्दो बावदिया आरो आसागी-बैसागीनि
दायखौ सवबो बिजिरनो
हाया जादोंमोन ।

अब्ला,

बिसार खुंनो—आसार होनो
मोनसिंसिं बोरायआ
स'नानि जांख्लाजों
ओंखारबोदोंमोन
बे गामियाव ;

बेनिखायनो,

बे गामिनि मुडा
मोनसिंसिं बोरायनि गामि—
सिंबोरायगामि—सिम्बोरगामि ।

बे सिम्बोरगामिनि

दैसाया जादोंमोन
स'नानि फुख्रि—
माइनावनि खुलि ।

बेनिखायनो

मोनसिंसि बोरायनि गामि

सिम्बोरगामियाव

बयबो फैयो—आंबो फैयो

माइनाव बोखांनो ।

दिल्लीनि बादशाह औरंजेबआ

स्वा-स्वानजा ह्वादरखौ गाग्लोबनो

राम(पाल) सिंह सेनापतिया रामफलबिलिआव

कुरबान आलिआ कुरखिल्ला—

खर्खिलायाव;

आरो,

सेनापति श्यामसिंआ

दानि शामसिंखिलायाव

किल्ला एबा खरं लुनानै

स्वोनाबारि सानथ्रिहान्जार्जो लोमसावहोदोमोन—

सोरगिदिं थुंग्रिनि गिथाव-बाथाव

सोदोब गोमखांदोमोन—

अब्ला,

बड़' राइजो-राजाफ्रा गिलुंबालुं जानानै

लोब् लोब् खारबोदोमोन

बे मोनसिंसि बोरायनि गामि

सिम्बोरगामियाव

माइनाव बोखांनो माइनाव नोगोराव ।

गंगार जाउफलंनि स्वाहा सेरफांगुरियाव

गंगार सानथ्रि श्वेरपाया दैदेननायाव

गुफुरसा-गंगारसानि गेजेराव

जेब्ला थैया-ना-थैया दावहा जादोमोन—

जेब्ला जावलिया देवानआ

बड़' राइजो दानायनि जान्जि खाफ्रादोमोन;

बड़' राइजो-राजाया जालाखार जानानानै
गावनि राजथावनि सिख्नाझारखौ
न'बधि नोगोर—नौ नोगोर खालामनानै
गारबोदोंमोन;

अब्लाबो, जालाखार जानाय बड़' राइजो-राजाया
मोनसिंसि बोरायनि गामि सिम्बोरगामिनि
माइनाव नोगोराव फैदोंमोन
माइनाव बोखांनो ।

आरो,

बे जालाखार जानानाय बड़' राइजो-राजाया
सिम्बोरगामिनि स्वाहा दैसा सेराव
गंगार राइजोनि शाम'खा सेनापतिजों
दावहा नांनादोंमोन—
दैसानि मुडा जादों अब्लानिफ्राय शाम'खा !

बे मोनसिंसि बोराय सिंबोरायनि गामि
सिम्बोरगामि

माइनाव नोगोराव माइनाव बोखांनो
बइबो फैयो;

आंबो फैयो—माइनाव बोखांनो !

उमेश अस्तादआ जेब्ला
कलिकातानिफ्राय जलतरङ्ग (दैगुथाल देंखो)
नि मेथाइजों जेब्ला गांग्रागुडियाव
देखो गुथाल थिखांदोंमोन—

अब्लाबो, बड़' राइजो-राजाफ्रा
लोब लोब फैदोंमोन !

बेबादिनो बे मोनसिंसि बोरायनि
सिम्बोरगामिनि
माइनाव नोगोरनि स'नानि फुख्रियाव

माइनाव बोखांनो बइबो फैयो ।
आंबो फैयो : माइनाव बोखांनो ।

दिनैबो दुलाराय बड़' राइजो-राजाया
राव आरो थुनलाइनि बिथिं दिहुननो

माइनाव नोगोरनि स'नानि फुखिनिफ्राय

स'नानि माइनाव बोखांनो—

थुनलाइनि माइनाव बोखांनो

बै मोनसिंसिं बोराय—सिं बोराय

सिम्बोरगामिनि

माइनाव नोगोराव

बइबो फैदों : आंबो फैदों ।

—*—

नों थैनो रेंनाय नंलिया

बेयो माबोरै जाखो बिनेश्वर

नों लुबैनाय Life after 60-आ

माबाव थांखो ?

नोंनि जीउआ जालांबाय दिनै

Life after 50 मानो ?

नोंनि सिमांखौ लानानै

‘बेरलावआ गोमोदोंमोन खोनाना’

‘आं 100 बोसोरनि बारा थांना

थागोन आदा।’

बेरलावआ आंखौ बुंदोंमोन : “आं ‘सार’नि

intuition-खौसो गिसोगारो,—

सार-आ माबोरै जागोन जाथाइखौ

बुनो हायो !”

बेरलाव ! माखासे गाज्जि intuition-खौ

बुनो मोना

थेवबो आंनि अनजालु फंबायनो

आंनि last piece आमलाइ

फिथाइखौ बाउनानै आं फोरमायनो सानदोंमोन

नोंजों लोगो मोननायआ बेनो

जोबथा नामा !

बिनेश्वर !

नों दा Life after 50 एबां 60 ल’

मोननाय नंलिया
नों मोनसिगोन immortal life
For yeon of years !

नों थैनोबो लुबैयाखैमोन
दा थैनायबो नंलिया;
नों थांनानै थासिगोन
बुहुमनि बिखायाव,
बड़'नि गोसोआव
जुग जुग जुगामि
नों जासिगोन अराय जुगामि ।

बिनेश्वर !

नों जुग जुग जुगामि
थैनो रौनाय नंलिया ।

